



Boston Public Library

PURCHASED FROM THE

Maria Whitney

MEMORIAL FUND ESTABLISHED BY

James Lyman Whitney

BIBLIOGRAPHER

AND SOMETIME LIBRARIAN

27658

Stamens
all 80

Handwritten text in a cursive script, likely a letter or a page from a manuscript. The text is arranged in approximately 12 lines, though it is significantly faded and difficult to decipher. It appears to be a formal or semi-formal communication.

Handwritten text, possibly a signature or a closing phrase, located in the lower middle section of the page. It is written in a similar cursive style to the main body of text.

Handwritten text, possibly a date or a reference number, located below the signature area.

Handwritten text at the bottom of the page, possibly a footer or a final note. It is less legible than the other sections.

*Manuscrit de
M. de
M. de*

1704

1704

4.

LET T R E
D E
LA R E Y N E
M E R E
D V R O Y
Louis 13^{me}
A M E S S I E V R S
D V P A R L E M E N T
D E P A R I S.

THE

OF

THE

OF

OF

OF

OF

OF



ESSIEURS, Apres
 que le Cardinal de Riche-
 lieu a fait tout son pouuoir
 pour alier du Roy, Mon-
 sieur mon Fils, la volonté de
 ses subiects ; ayant chassé ou
 emprisonné dix Princes, qua-
 tre Princesses, trois Mareschaux de France, les
 plus intimes domestiques, & la pluspart des per-
 sonnes de merite, & de condition : apres auoir
 vsé de semblable traictement vers la Mere, la
 Femme, & le Frere du Roy ; foulé aux pieds la
 Dignité des Couronnes, & le respect du Sang
 Royal ; violé les loix de l'Estat, & de la Iustice ; in-
 terdit les Cours Souueraines ; chassé les gens de
 bien ; estably ses complices ; ruiné le peuple ; es-
 puisé les Officiers ; rauy & vollé tout l'argent de
 France : apres s'estre mis en possession des clefs
 du Royaume, qui sont les ports de Mer, les places
 principales, les charges, les armes, les vaisseaux,
 & l'autorité absoluë ; & de telle sorte abatu les
 esprits par la terreur & la misere, qu'il n'y a plus

personne qui luy puisse resister , ny qui luy ose contredire ; il s'en va commencer le dernier acte de sa Tragedie , & mettre tout à feu & à sang par la rupture entre les Couronnes ; & si cela ne suffit , par l'inondation des barbares qu'il attire dans la France. Il y a long temps que par diuers traictez avec les Protestans & les heretiques de toutes nations , avec les infideles & les ennemis du nom Chrestien , & avec tous ceux qui sont contraires au repos & à la tranquillité publique , il iette les fondemens de ces damnables attentats , tantost sous pretexte d'assister les alliez de France , tantost d'empescher l'agrandissement d'Espagne , tantost de luy oster la communication avec l'Empire ; & generalement , que sans pretexte , ou avec pretexte , il broüille la France avec tous les Princes de l'Europe ; offence les vns , pratique les autres , tant qu'il les ait tous mis aux mains entre eux , & avec elle. I'ay fait mon possible pour detourner ces malheurs dès le commencement que ie m'en suis apperceüe , y apportant , selon le temps & les occasions , les remedes necessaires : Dieu a permis par quelque raison cachée dans les secrets de

de sa Prouidence, que le trop de douceur & de retenuë, dont i'ay vsé en voulant sauuer le public, m'ait en certaine sorte perduë & enuelopée dans ses ruines ; & que le Cardinal de Richelieu pouuant maintenant, par mon absence, faire impunement tout ce qu'il luy plaist, & descouurant ses mauuais intentions à mesure qu'il en aduance le succez, s'en va ouurir la guerre à l'Allemagne, l'Espagne, l'Italie, les Pays bas, & en vn mot, à tout ce qui est ioint à l'Empereur & au Roy Catholique. Il a faict entrer à ce dessein desia pour la troisieme fois les François dans la Valteline: il a retenu Pignerol, apres les restitutions de Cazal & de Mantouë ; renouïé ceste ligue qui a tant cousté de sang & d'argent à la France, remis sur pied ses desseins contre Gennes, & fait acte d'hostilité en plusieurs sortes dans les terres de l'Empire. Vous voyez comment la France est mangée & couuerte de gens de guerre, sans que personne luy en donne subiect, ny luy demande rien. L'on m'aduertit de toutes parts, mesmes de Venise, de Sauoye, & Bauiere, de ses traictez & ses desseins, conceus en apparéce contre l'Espagne, pour

executer en effect contre la France. Je suis donc
 obligée, en continuant les devoirs dont la nature
 & la raison ne permettent pas que ie me departe
 iamais, de faire tout ce qui est de moy, afin que
 le Roy, Monsieur mon Fils, connoisse la verité
 de ces pernicieuses entreprises: & ne pouuant luy
 faire tenir des lettres, ny communiquer avec luy
 par aucun des miens, le Cardinal de Richelieu
 les faisant mettre en prison, & les empeschant
 de le voir; apres auoir mis au hazard celles dont
 ie vous enuoye la copie, i'ay recours aux voyes
 publiques, & particulierement à celles que les
 Loix de l'Estat ne permettent pas qui puissent
 estre fermées à personne. Comme vous estes
 instituez entre le Roy & les peuples pour estre
 vers eux les dispensateurs de la Iustice & de l'au-
 thorité Souueraine; vous estes entre eux & luy
 pour empescher les oppressions tant generales
 que particulieres: de là vient que l'on reuere vos
 Arrests, & qu'aux affaires importantes, comme
 celles-cy, chacun iette l'œil sur vous pour appren-
 dre ce qu'il doit faire; sçachant bien que l'on ne
 peut estre blasmé ny repris, en suyuant vostre
 exemple

exemple & vos resolutions. On vous reconnoist
 aujourdhuy la plus saine partie de l'Estat, & la
 plus considerable, pour l'autorité & la dignité
 de vos charges, pour vos biens, & vos alliances,
 pour l'intérêt que vous avez au bien public, &
 pour l'affection que vous portez au Roy Mon-
 sieur mon Fils, & à la Maison Royale. C'est
 donc principalement à vous que ie me dois ad-
 dresser, pour m'ayder à l'informer de ce qui se
 passe en son Estat, & des malheurs dans lesquels
 le Cardinal de Richelieu le va jeter, exposant la
 Chrestienté aux infideles, la Religion Catholi-
 que aux heretiques, la France au pillage, & sa Per-
 sonne aux trahisons qu'il a conspirées contre luy.
 Il ne se traicte icy, ny d'eiter aucun peril, ny de
 reprouver aucune iniure. Depuis plus de vingt
 ans que j'ay commencé à gouverner la France, &
 plus de trente que fut fait le traicté de Paix, elle
 a esté obseruée des deux parts, sans que l'une ait
 pris ny recherché aucun aduantage sur l'autre,
 quelques troubles, & quelque minorité que nous
 ayons eüe; on n'en a pas seulement à ceste heu-
 re le moindre soupçon. Quel vsage donc, ou
 quelle

quelle apparence de raison a iamais faict entre-
 prendre de gayeté de cœur la ruine des princi-
 pales parties de la Chrestienté , sans des causes
 importantes, necessaires, & conuës de tout le
 monde pour ineuitables? Que manque-t'il à la
 France, pour estre le plus heureux & le plus fleu-
 rissant Royaume de l'Vniuers, sinon la Paix? &
 qui luy fait la guerre, sinon elle mesme? ou pluf-
 tost ce malheureux, qui ne butte qu'à sa destru-
 ction. Ceste Paix si long temps desirée, & si so-
 lemnelement establie par le feu Roy Monsei-
 gneur, a esté cimentée par les plus estroictes al-
 liances qui se puissent faire entre des Couron-
 nes, & conseruée avec tant de peines & de soins.
 Voicy le temps promis à la France depuis tant
 d'années, de luy laisser recueillir ses biens, de sou-
 lager les fardeaux extraordinaires que porte ce
 pauvre Royaume: & au lieu du repos si necessai-
 re, & demandé à Dieu par tant de prieres, l'interest
 & la fantasie d'un homme de si peu de confi-
 deration, renuersera toute l'Europe, & mettra
 toute la Chrestienté en armes contre elle mesme?
 J'auray en ceste affaire cinq Enfans, & trois Gen-
 dres,

dres, & à l'aduenir encores leurs descendans, en la ruine desquels consiste la perte de la Religion Catholique; & ie ne seray pas receüe à m'y interposer? ie n'auray pas droict de m'en plaindre? & ie n'oseray parler, ny pour moy ny pour mes Enfans, ny pour la France, à laquelle i'ay l'obligation de m'auoir rendu plus d'honneur & d'obeissance, qu'à Reyne qui ait iamais porté ceste Couronne? Miserable France! qui deuendra le theatre sanglant de toutes les nations de l'Europe; où il va faire choquer les plus grandes Puissances de la terre, à condition que les autres seront les spectatrices, & qu'elle seruira de proye, & de champ de bataille. Il promet de destruire l'Empire, d'abaisser la Maison d'Austriche, de troubler l'Italie, de rauager l'Allemagne, d'inquieter l'Espagne; & tout cela dans trois ou quatre mois, qui luy peuuent rester à faire ceste vie. Veritablement, quand il n'auroit point d'autres desseins cachez là deffous, on voit clairement que ce sont des proiects d'un furieux, & d'un melancolique, qui ne medite que la ruine & l'embrasement de tout le monde: & qu'attribuant à

sa conduicte les effects de l'autorité Royale, & de l'amour & du respect que l'on porte au Roy Monsieur mon Fils, qui a faict ceder aux violences que nous souffrons; il s'imagine de trouver la mesme deference par tout, & sans nulle preuoyance ny consideration de l'aduenir, il ne regarde qu'à se satisfaire pour le present, & s'abandonne entierement aux premiers aduantages, qui arriuent d'ordinaire à ceux qui preuiennent. Mais dans la suite des affaires, lors que le feu sera allumé de toutes parts, que les nations seront aigries les vnes contre les autres, les peuples passez au fil de l'espée, les villes pillées & saccagées, les Eglises abattuës, la Religion bannie, la Noblesse ruinée, les Maisons Royales par terre, & la plus part de ceux qui viuent à ceste heure, seront morts ou exposez à des miseres, dont la pensée seulement donne de l'horreur; où sera le Cardinal de Richelieu auteur de tous ces maux, & à quoy seruira-t'il de detester pour iamais sa fin, comme sa memoire? Suffira-t'il pour la consolation de ceux qui viuront, de voir que l'Espagne & l'Italie endurent de plus grandes ou de semblables ruines?

Le ne croy pas, Messieurs, qu'il y ait personne si despourueuë de iugement (si ce n'est luy) qui ne croye que nous sommes au temps de conseruer la France en paix & en repos, & non pas d'entreprendre des conquestes imaginaires : que de telles puissances, que celles dont il s'agit, fondées & establies de longue main, & subsistant dans leurs causes internes, assauoir l'vnion & l'obeissance, ne sont pas des entreprises d'un mois, ny d'un an ; ny dont le Cardinal de Richelieu, qui veut faire le commencement, ny beaucoup d'autres apres luy, puissent esperer de voir la fin. Vn village pris n'engage-t'il pas tout vn Estat, & la possession en demeure-t'elle iamais ; si ce n'est par aduenture apres des siecles, & de telle consequence que la condition des vainqueurs est bien souuent la pire ? N'auoit-il pas eu les memes imaginations aux passages d'Italie : les Commissions qu'il s'estoit faict donner pour en distribuer les Prouinces & les places, en font assez de foy. Qu'est-il reussi en fin de ces grands desseins de Gennes, de la Valteline, de Sauoye, de Piedmont, & de tout le reste, qui ont cousté à la Fran-

ce la vie de tant d'hommes, & la ruine de tant de familles? On ne parle plus que d'un échange simulé de Pignerol. Le feu Roy Monseigneur changea le Marquisat de Salusse pour auoir vne Prouince, & profita par dessus cela de la paix: & ce Capitaine Prestre, donnera vne Prouince pour vne place, & nous engagera de plus à la guerre? Mais ie veux supposer que sa partie soit bien faite; que la Suede soit aussi puissante que toutes les forces de l'Empire; la Sauoye, que celles de l'Estat de Milan, du Royaume de Naples, & des Princes d'Italie: apres tout cela, qui me respondra du succez de si grandes reuolutions? qui m'asseurera que le sort des armes, qui est tousiours incertain, ne puisse tomber aussi bien sur la vie & sur l'Estat du Roy, Monsieur mon Fils, que sur les autres? Vn homme de ceste sorte hazarde aysement des Roys qui ne luy font rien, & des Royaumes ausquels il n'a rien: il ne peut que gagner en la perte de tout le monde. Le Roy, Monsieur mon Fils, a interest en cecy du Royaume de France: & en perdant la France, le Cardinal de Richelieu n'en court fortune que de quatre cens liures de rente, qu'il

qu'il peut auoir de legitime. Ce pendant toute la Chrestienté s'embarquera là dessus ; & ce sera aux infideles de s'en rendre les Maistres, ou de nous accorder. Mais quel accord pourra-t'on faire, lors qu'on aura violé le double lien de ces Mariages, qui est le plus puissant moyen d'amitié & de concorde, que la nature pouuoit donner entre ces deux nations? I'ay ouy tant de fois deplorer les miseres de ceste sorte de guerre, que ie ne croy point, qu'aucune personne sensée ne les tienne pour le plus grand malheur qui puisse arriuer à la France. Le feu Roy Monseigneur, qui auoit soin sur ses derniers iours de m'instruire de toutes ses affaires, ne me faisoit parestre d'auoir aucune chose en plus grande recommandation, que l'vnion de ces Couronnes : & dans les Conseils, ausquels il desiroit que i'assistasse (comme quelques vns de vous se peuuent souuenir) on ne traictoit d'ordinaire que de pacifier les differens qui se presenteroient entre les Princes Chrestiens ; de rendre la France opulente & magnifique, d'empescher que son pauvre peuple ne fust foulé, de chercher des moyens de le soulager de plus en plus ; de con-

seruer la bonne correspondance entre les voisins alliez & interessez avec cette Couronne, de leur maintenir la foy & les promesses; de se faire aimer de ses subiects, d'autoriser la Iustice, d'auoir soin de la Religion Catholique, & de la paix de la Chrestienté. On ne peut douter que ie ne sois bien informée de ses dernieres intentions, qui estoient entierement conformes à cela, quelque apparence qu'il y eust du contraire. Aussi estoit-ce le souuerain desir de ce grand Prince, de voir les alliances, que Dieu m'a fait la grace d'establir depuis, comme le seul moyen d'asseurer vne longue paix dans son Royaume, & de le rendre par là plus grand & plus puissant, que par toutes les victoires auxquelles son courage le pouuoit faire aspirer. Je laisse maintenant decider à ceux qui connoissent la legereté de l'esprit, & les imaginations creuses, & pleines de vent de ce nouuel homme de guerre, si veritablement il en sçait plus que ne sçauoit le Roy Monseigneur, ou si par des effects contraires il ne monstre pas de contraires intentions. Si la Maison d'Austriche est en meilleur estat qu'en ce temps là, faisons nous mieux de l'atta-

l'attaquer? si elle est pis, la deuons nous craindre dauantage? De s'arrester aux imprimez, & aux nouuelles que le Cardinal de Richelieu compose pour le petit peuple, ce seroit estre dans vne ignorance aussi grossiere du pouuoir des plus grandes Couronnes de l'Vniuers, comme c'est vne faute signalée en la conduicte des Estats, d'engager vn Royaume sur de si foibles fondemens, que le succez d'un combat, qui peut changer du iour au lendemain. Les esprits solides traictent les matieres d'Estat avec d'autres poids, & de plus hautes considerations: ils n'ont garde de hazarder, sur quoy que ce soit, ie ne dis pas de grands Roys, (ce qui n'entra iamais dans la pensée d'un homme sage) mais le moindre point d'honneur & de reputation. Nous auons bien subiect de loier Dieu, d'auoir conserué la France autant de fois que sa mauuaise conduicte l'a mise en peril. Vn Ministre habile & affectionné, qui se voudroit preualoir des affaires presentes, scauroit qu'un tiers, qui se met de la partie quand deux commencent à se battre, court fortune de tous les deux, & les accorde bien souuent à son preiudice,

dice , au lieu qu'attendant qu'ils se soient affoi-
 blis , il a l'avantage sur l'un & sur l'autre. Mais ce
 n'est là, ny la conduicte ny le dessein du Cardinal
 de Richelieu : il regarde son interest present ; &
 non celuy du Roy, ny present ny aduenir : il veut
 faire du mal à la France , & non pas du bien ; &
 quand le Roy de Suede & le Duc de Saxe auront
 du pire , ou s'accorderont avec l'Empereur,
 quand il leur en arriuera autant qu'au Palatin,
 & aux autres qui auoient mal pris leurs mesures,
 le Roy Monsieur mon Fils & son Royaume en
 patiront, & non pas le Cardinal de Richelieu, qui
 sera bien loin, ou qui en profitera. Si durant le
 temps qu'il n'y a eu ny mouuement au dedans,
 ny ennemis au dehors, que ceux qu'il luy a pleu,
 on a espuisé la substance du peuple, & chargé la
 France de tant d'Edicts & d'impositions, que tou-
 tes les Prouinees ont esté prestes à se porter aux
 mesmes extremitez que la Bourgongne & la Pro-
 uence ; que sera ce maintenant dans vne guerre
 générale , en laquelle il faudra défendre quatre à
 cinq cens lieües de frontiere , & entretenir six ou
 sept armées de terre , & deux de mer , sans celles
 qui

qui seront destinées à l'offensive, & les garnisons, munitions, & fortifications de tant de places; le pauvre peuple estant abandonné à la mercy du soldat, le trafic perdu, la campagne despeuplée, les villes pillées, & par conséquent tous moyens tant ordinaires qu'extraordinaires venant à manquer? Où se pourront loger & nourrir les gens de guerre que dans les maisons de la Noblesse, & de quoy les payera-t'on que du bien des Officiers? Qui fournira aux charges de la Couronne, & sur tout à celle qui couste & pese plus que la guerre, assaüoir les rapines & l'auarice insatiable du Cardinal de Richelieu? S'il a peu faire naistre tant de soupçons, & mal traicter tant de personnes, lors qu'une si longue paix en ostoit toute apparence de subiect, & que la iustice l'a contraint à quelque espece de formes, qui sera celuy qui dans la licence des armes, & dans la facilité de donner ombrage de qui bon luy semblera, puisse auoir une heure d'assurance de son bien & de sa vie? Combien fera-t'il de nouuelles prisons? combien erigera-t'il de chambres de Iustice, & de Domaine? & de combien de confiscations fera-t'il

C

sous

sous le nom du Roy , le mesme tour qu'il a faict des places , & des charges qu'il vsurpe? Si l'estre Femme , l'estre Reyne , l'estre Mere du Roy , l'auoir l'interest que i'ay au bien de la France pour moy & pour mes Enfans, luy se voyant en estat qu'il ne despend que du premier qui aura la hardiesse de dire vn mot au Roy Monsieur mon Fils, de le mettre pour toute sa vie en vne Tour, ou de luy faire souffrir le supplice que meritent les crimes dont il est tout conuaincu , n'empescher point qu'il n'ait l'impudence de me faire des outrages qui seront incroyables au temps aduenir; que fera-t'il à ceux qui ne pourront auoir pour apuy que le silence , ny pour raison que l'innocence ? quelle tyrannie n'exerceroit il point, s'il se trouuoit vne fois assure de sa condition , & affranchy du ioug qui luy est si insupportable? Croyez vous, Messieurs, qu'il laisseroit vn seul homme avec du bien , qu'il souffriroit plus d'Officiers de iustice, de police, de loix, de Magistrats , ou de forme de Gouuernement & de Royaume? Ny luy, ny les choses ne peuuent subsister de la sorte, tenir l'honneur, les biens, la

vie,

vie, la liberté de tout le monde; vouloir toutes
 les charges d'un Estat, tout l'argent, l'autorité,
 les bénéfices, les honneurs & les dignitez; ruiner,
 chasser & desposseder vn chacun; bannir le Fre-
 re du Roy, emprisonner la Mere, violenter la
 Iustice, faire des Iuges à sa poste; tromper con-
 tinuellement vn Prince, fourbe sur fourbe, men-
 songe sur mensonge, & vn Prince qui n'eut ia-
 mais de pareil en Vertu, & en Bonté : la nature
 souffre en cela vne violence trop extreme. On
 voit des monstres, il arriue des prodiges; mais ny
 les vns ny les autres ne sont de durée, aussi se sent
 il proche de sa perte. Il connoist bien de ne pou-
 uoir euitier tant de dangers qui le menacent, du
 Roy, de la Iustice, de tant d'ennemis, & de
 personnes outragées; les vns criant apres leurs
 biens, les autres apres leur honneur; les maris
 demandant la vie & la liberté de leurs femmes,
 les femmes de leurs maris, les enfans de leurs pe-
 res, les freres de leurs freres; & generalement, de
 tous les ordres & de toutes les conditions de l'E-
 stat, sans distinction d'aage, de sexe, ny de quel-
 conque qualité. Peut il auoir vn moment de seu-

reté au milieu de tant de périls? Le moindre bruit qui le surprend, la moindre personne qu'il soupçonne, le faict pallir & trembler mille fois le iour. Il craint tout le monde; comme il faict mal à tous: il hait tout le monde, comme il est en horreur à tous: mais sur tout, il hait le plus, celuy qu'il craint dauantage, & qui luy faict le plus de bien, assauoir le Roy Monsieur mon Fils, estant en perpetuele apprehension de luy, il medite continuelement sa perte; & se trouuant dans la necessité de s'enfuir, ou d'estre pris, il est tousiours aux escoutes, & prest à preuenir l'un & l'autre par vn coup diabolique. Voila pourquoy se voulant sauuer quand bon luy semble, il a preparé ceste fuitte de places, de Pontoise, du Pont del' Arche, du haure de Grace; & d'un autre costé, de Saumur, la Rochelle, Broüage, & les Isles, accompagnées des Gouuernemens de ses supports & complices, & en tout cas de vaisseaux pour se ietter en mer, ne tenant en aucun lieu sa vie asseurée. Il est vray, que s'il ne songeoit qu'à la fuitte, il se seroit contenté de moins de places, & ne les auroit pas fortifiées de la sorte, ny rem-
plies

plies de gens qui ne reconnoissent point le Roy, mais luy seul, & de tant d'armes, d'argent, & d'artillerie, avec tant de vaisseaux equippez, que l'on dit qu'il tire tous les ans sous ce pretexte pres de vingt millions de liures. On sçait bien, que durant la paix il ne peut garder toutes ces places contre le Roy Monsieur mon Fils; & que pour les liurer au dehors, ou en faire vn party au dedans, il faut que le Royaume soit en guerre: voila pourquoy il l'a tousiours mis en cet estat, depuis qu'il y a du pouuoir. Ioinct aussi que ne tenant au Roy Monsieur mon Fils, ny par affection ny par inclination, mais par la seule habitude de l'employer, il a tousiours augmenté ses occupations, & rendu ses affaires plus mauuaises, afin d'y estre plus necessaires. Maintenant que ses desseins vont en auant, & qu'il se voit en estat de subsister contre son Roy; il aspire non seulement à ceste partie de la France qui luy est assurée, mais tout le Royaume encôre sera peu à l'excez de manie & d'ambition qui le possede. Il ne faut point s'imaginer, que ny loix, ny respects, ny raisons, ny Dieu, ny les hommes luy soient en

aucune consideration pour le tenir dans ces bornes : les choses qu'il a faictes , monstrent ce qu'il est capable de faire ; ses actions fournissent d'exemples en luy mesmes , de ce que nous n'aurions pas creu du plus meschant de tous les hommes : ses partis de Religion, & de faction, sont faicts au dedans; les heretiques, les barbares, & les infideles sont preparez au dehors : la France est au mesme temps exposée à ses amis & à ses ennemis : & luy se trouuant maistre des forces du Royaume par son autorité, du dedans par ses menées, du dehors par ses confederations; il exercera, quand il en verra le temps, ses horribles attentats sur la vie du Roy Monsieur mon Fils : & comme d'un Royaume abandonné, il en prendra le tout, ou la partie qu'il pourra, donnant le reste en proye aux complices de ses effroyables trahisons. La douleur m'empesche d'esclaircir davantage ce point, & de considerer quelle sera lors la face miserable de la France: ie demande seulement à Dieu, que si ie ne suis capable d'y donner remede, il ne permette point que ie suruiue au Roy Monsieur mon Fils, & à la perte de son Royaume. Que diroit le Roy
Mon-

Monseigneur, & vostre bon Maistre, voyant de la sorte sa Femme, ses Enfans, & sa France, qu'il auoit renduë l'honneur & l'admiration de toute la terre, qu'un homme sans nom & sans naissance, & d'une profession si esloignée des armes, eust l'effronterie d'arracher le commandement de ses Armées, non seulement aux Princes, & à tant de personnes de qualité qui ont consumé leur vie dans les guerres, mais à son propre Fils, & de le voir au mesme temps entreprendre sur l'autorité Souueraine, vouloir egorger ses Enfans, & aspirer à la Couronne? Que diroit-il de le voir gourmander son Parlement, auquel luy mesme rendoit tant d'honneur, & prenoit plaisir à dire que l'Estat estoit tenu de sa conseruation? Vous verriez les larmes couler sur son visage, duquel vous n'avez iamais receu que des regards de douceur & d'affection: il vous parleroit non pas en Maistre, mais en Pere, & vous priant, & vous coniuant tous, de ne point abandonner ce qu'il auoit de plus cher au monde; il vous feroit les mesmes prieres, que ie vous fais à ceste heure en son nom, de remonstrer au Roy son Fils, & le mien, les malheurs

heurs de ces guerres , & les pernicieuses intentions de celuy qui l'y veut engager . Je vous en coniure , Messieurs , par la fidelité que vous luy avez renduë , mesmes apres sa mort , en l'establissement de ma Regence ; dont l'obligation que ie vous ay en faueur de mes Enfans , ne sortira iamais de mon souuenir : ie vous en coniure au nom du Roy, Monsieur mon Fils , qui vous connoist & vous ayme , quoy qu'il soit destourné de vous comme de moy. Assez d'autres Princes excellens en vertu & en bonté sont tombez dans le malheur d'estre mal seruis & abusez ; mais iamais vn si bon que luy ne s'est rencontré en de si dangereuses mains : i'espere pourtant que Dieu ne l'abandonnera point ; il a eu dès son enfance sa crainte & son amour deuant les yeux ; ses intentions sont toutes saintes & pieuses : il ne faut qu'un moment & vn peu d'assistance pour le deliurer. Ne doutez point , qu'apres cela il ne vous rende à tous plus de tesmoignages que iamais de son affection. Discernez ce qui vient de luy, assauoir tout ce qui est de Raison & de Iustice , pour luy en sçauoir gré , d'auec les actions de ce destructeur

ſtructureur de la France , pour luy en attribuer la
 faute, & rien au Roy Monsieur mon Fils, qui n'y
 participe d'effect ny de volonté. Exhorteſſez le à la
 paix, ſi importante à ſa vie, ſi neceſſaire à ſon peu-
 ple, ſi conforme à ſa Pieté, & ſa Bonté, ſi deſirée de
 tous, & de moy particulierement, qui apprehen-
 de tant de ſiniſtres euenemens du contraire. Ad-
 uertiffez-le de deſtourner de luy les maledictions
 de Dieu, & des hommes, qui tomberont ſur l'au-
 theur de ces deſolations. On n'a iamais faiſt de
 ſemblables entrepriſes ſans en demander vos ad-
 uis : vous auez droit de les dire en tout ce qui
 importe au public, mais particulierement où il y
 va de la ruine de l'Eſtat : vous ne pouuez refuſer
 de communiquer au Roy Monsieur mon Fils
 ceſte priere que ie vous fais, avec offre de faire
 apparoiſtre de tout ce que i'ay dict; ne deſirant
 point que vous ayez eſgard ſur cecy à aucun de
 mes intereſts, en tant qu'ils ne toucheront qu'à
 mon particulier, mais ſeulement à ce qu'ils im-
 portent au Roy Monsieur mon Fils, & à la Fran-
 ce. Reiterez luy vos remonſtrances, & ſurmon-
 tez par la force de la Verité en la bouche de la Ju-

D

ſtice,

stice, les ruses & les impostures dont il est surpris. Vous estes les seuls qui auez donné, en ces occasions, des preuues de courage & d'amour à vostre patrie : vous auez la gloire d'auoir porté pour le public des souffrances memorables à la posterité : poursuiuez avec les mesmes vertus, & ceste mesme generosité : Dieu vous fera la grace de sauuer le Roy, & l'Estat; la Maison Royale, & celle qui prie Dieu, Messieurs, vous tenir en sa sainte garde.

Vostre bien bonne Amie,
MARIE.

A Bruxelles, ce vi. Ianuier, M. DC. xxxii.





